



Ujaqqanik pinnerasaasiassanik nunatsinneersuunerannik uppernarsaammik allagartalersuineramik pilersitsillutik atuutitsilernissaannik Naalakkersuisut peqquneqarnissaannik inatsisartut aaliangiiffigisassaattut siunnersuut. Tunngavineqassalluni ujaqqat pinnerasaasiassat nunatsinneersut ujaqqallu qiperukkat nunatsinneersut pillugit uppernarsaammik allagartaliisarneq pillugu nalunaarusiaq juni 2017-meersoq.

(Inatsisartunut ilaasortaq Peter Olsen, Inuit Ataqtigiit)

(Siullermeerneqarnera)

Qularutigineqassanngilaq ujaqqat pinnerasaasiassat atortussiallu aatsitassarsiornermut pingaaruteqarmata isumagilluarlugillu assigiinngitsutigut, kisianni suut tamarmik killilimmik pisariaqarput. Siusinnerusukkut ataatsimiinnerni assigiinngitsuni qulequtaq pissanganaisoq pillugu siunnersuutit assigiinngitsut oqaluuserisarnikuuagut.

2015-mi taamani Naalakkersuisuusoq peqquneqarpoq ujaqqanik pinnerasaasiassanik nunatsinneersuunerannik uppernarsaammik allagartalersuisinnaaneq pillugu nassuiaasioqqullugu. Aamma nalunngilarput annikitsumik ingerlatsinissamut akuersissummik peqartut allallu soqutigisallit assigiinngitsut oqaloqatigineqarnikuusut pineqartoq pillugu. Taamatut ujaqqanik pinnerasaasiassanik uppernarsaammik allagartalersuisalernissamut siunertaavoq pilerisaanissamut tunngaveqalernissaq kiisalu ujaqqat pinnerasaasiassat nioqqutigineqartut immikkuullarissutut isigineqarnissaat kiisalu nunatsinni suliarinqearlutillu atorqartuusut. - nassuiaammi erserpoq innersuussutigineqarsimasoq pilerisaarinermut atatillugu uppernarsaammik allagartalersuisarnissaq iluarnerpaassasoq. - nassuiaammi aamma atuarneqarsinnaavoq ilisimatusarnermik aallaavilimmik uppernarsaammik allagartalersuisalernissaq Kalaallit Nunaannut tulluarpallaanngitsoq.

Qaqilerilaaraanni takuneqarsimaavoq aamma tamanna pillugu tusarniaanermut atatillugu akissuteqarnerminni Kommuneqarfik Sermersooq sanaluttartullu peqatigiiffii isumakuluutiminnik saqqummiussimasut ilaatigut oqaatigineqarluni taamatut uppernarsaammik allagartalersuisalernissaq illuatungeriinnut allaffissornikkut pisarissersuutaavallaarujussuassasoq. - pilerisaanissamut tunngavissaqarusunnermut tunngatillugu aamma qulartoqarsimavoq. Siorna Nuummi annikitsumik ingerlatsisarneq pillugu isumasioqatigiittoqarpoq, tassani aamma uppernarsaatinik allagartalersuisalernissaq qulequttanut ilaatinngarpoq aamma tassani taamatut aaqqissuussinissaq ilalernartutut isigineqanngilaq.



Taamaatumik takusinnaasakka naliliisinnaassuseralu naapertorlugit taamatut uppersaammik allagartalersuisalernissaq ornigineqanngilaq - aamma piumaneqanngitsoq uanga naalakkiutigerusunngilara, tunisassiornerlu siuarsassagutsigu suarsuppassuarnik pisarissersuissanngilagut isumassaqartinngisaannik.

Taamatut tunngavilersuereerluta siunnersuut manna itigartipparput.